

Zeitschrift: Igl Ischi : organ della Romania (Societat de Students Romontschs)

Herausgeber: Romania (Societat de Students Romontschs)

Band: 16 (1918)

Artikel: L' alp Russein de Trun

Autor: Vincenz, A.

DOI: <https://doi.org/10.5169/seals-882293>

Nutzungsbedingungen

Die ETH-Bibliothek ist die Anbieterin der digitalisierten Zeitschriften auf E-Periodica. Sie besitzt keine Urheberrechte an den Zeitschriften und ist nicht verantwortlich für deren Inhalte. Die Rechte liegen in der Regel bei den Herausgebern beziehungsweise den externen Rechteinhabern. Das Veröffentlichen von Bildern in Print- und Online-Publikationen sowie auf Social Media-Kanälen oder Webseiten ist nur mit vorheriger Genehmigung der Rechteinhaber erlaubt. [Mehr erfahren](#)

Conditions d'utilisation

L'ETH Library est le fournisseur des revues numérisées. Elle ne détient aucun droit d'auteur sur les revues et n'est pas responsable de leur contenu. En règle générale, les droits sont détenus par les éditeurs ou les détenteurs de droits externes. La reproduction d'images dans des publications imprimées ou en ligne ainsi que sur des canaux de médias sociaux ou des sites web n'est autorisée qu'avec l'accord préalable des détenteurs des droits. [En savoir plus](#)

Terms of use

The ETH Library is the provider of the digitised journals. It does not own any copyrights to the journals and is not responsible for their content. The rights usually lie with the publishers or the external rights holders. Publishing images in print and online publications, as well as on social media channels or websites, is only permitted with the prior consent of the rights holders. [Find out more](#)

Download PDF: 30.07.2025

ETH-Bibliothek Zürich, E-Periodica, <https://www.e-periodica.ch>



L'alp Russein de Trun.

*Sia derivonza dalla abbazia de Mustér
sco feudum en favur de vischins de Trun
e sia svilupaziun en mauns de quels
tier ina alp de corporaziun.*

Enasisum la val Russein, sil pei meridional dil Crap-Glaruna e dil Péz Russein, schaian las duas spaziusas alps dellas corporaziuns Russein-Mustér e Russein de Trun, spartidas ina da l' autra tras l' aua, che perquora la vall: Russein-Mustér sin la costa occidentala, Russein de Trun sin la costa orientala de quella. Situadas en in von sin aulta terrassa, sezuppan ellas cun lur stretgs confins spundivs d' uaul encunter miezdi dalla vischionta alp Cavrein, appartenenta alla venerabla claustra de Mustér.

Omisduas alps, divididas ensem en 261 dretgs de vaccas, Russein-Mustér cun 140 e Russein de Trun cun 121, han avon temps medemamein apparteniu all' abbazia de Mustér, aschia che quella, tier posseder aunc beindifferentas alps ella Cadi, ei stada signura e patruna dell' entira vall Russein. Quellas duas alps ein pli tard vegnidas surdadas dalla claustra sco feudums l' ina a vischins de Trun, l' autra a vischins de Mustér. Perdetga de quei dat

per Russein de Trun la brev de feudum de 1461 egl archiv de Trun; per Russein-Mustér exista il document de nies saver buca pli, denton resulta il feudum d' in posteriur document de 1602, contenius egl archiv de Trun e publicaus giud pagina 46 digl urbari della claustra cun entginas nunexactadats da Dr. Casp. Decurtins sco aggiunta VI tier sia lavur «Die Disentiser Kloster Chronik des Abtes Jacob Bundi».

Sco per l' alp Russein de Trun ei il tscheins-fier tenor tal document era staus fixaus per Russein Mustér sin 3 centners caschiel. Per obiect de feudum precisescha la claustra pils de Trun ella brev de 1461 sia *mesa* alp Russein. Daccord cun quest factum motivescha la pergaminea de 1602, che las duas alps Russein seigien lu avon biars onns vengidas sligliadas entras partiziun l' ina giud l' altra, nunder resultetscha claramein la unitat primara dil bein en mauns della claustra. Da tals documents sa denton buca vegnir eruiu, schebein ils vischins de Trun e de Mustér ein vegni investgi cun lur feudums da temps different, e quals avon, ne sche quei fuss forsa daventau el medem temps e gest en uniu cun la partiziun.

En questa connecziun vulein nus remarcar, che da quei temps, el dequors dil 15avel tschentaner, hagi l' abbazia de Mustér semussau fetg inclinada tier la creaziun de feudums enviers sia gleut della Casa de Diu (Cadi). Aschia dat denter auter avat Pieder de Pultengia 1440 l' alp «Butzolas» alla gleut della

vall Medel sco feudum*; avat Johannes 1460 las alps Naustgel e Valesa a vischins de Sumvitg**.

Returnond tier nies pensum: «L' alp Russein de Trun en sia derivonza dalla abbazia de Mustér sco feudum en favur de vischins de Trun e sia svilupaziun en mauns de quels tier ina alp de corporaziun», laschein nus plidar cun exactadat diplomatica ina translaziun romontscha dils documents e tschentaments, conteni el cudisch de tala alp, meaus en lungatg tudestg dapi 1602 enneu.

Deplorablamein ei igl original tudestg buca de anflar pli. Reproducend la translaziun romontscha igl original tudestg mo en fuorma reducida, encre-scha quei a nus ton pli en vista della suondonta remarca iniziala, contenida el cudisch de translaziun.

«Compendiusa annotaziun dils Documents vegls, Sco la breff dil surdau Lehen della alp de Russein de Trun, Sco era las convignentschas successivameing faitgias dils interessai personavels della medema alp, sco sesaffla scrett enten il Cudisch velg dataus digl onn 1602. Sco era copia dils originals, reduciu enten quest cudisch Sumariameing, per ton pli Sigerezia che entras reporer de in maun a l' auter maneivlameing Saven-san vegni Schmeri ne mess a piarder. E per quella fin deigien allura ils originals vegni messi enten igl archiv e quest Cudisch desperas per

* Document original egl archiv de Medel.

** Document publicaus da Dr. Decurtins sco aggiunta 3 tiella lavur „Landrichter Maissen“.

comet e Satisfacziun dils personavels Salvau enten lur Mauns, ilg qual ei entras Dumendar dils medems traitg ensemens a Scret giu entras mei Johann Caspar Nay igl onn 1801, ils 12 de Juli, de quei temps President dilg District Sura de la Reinquelle».

Documents e tschentaments.

(Successiun tenor cudisch de translaziun.)

*Document de 1461.**

«Nus Johannes** tras grazia de Diu avat della venerabla Claustra de Mustér e nus in entir Convent de quella enconoschein a surdein aviartameing con questa breff per nus e nies vignient suenter, che nus beinpatertgiont e con cuseilg d'auters nos cusigliers veien surdau e surdein enten vertit de questa bref per in stateivel perpetten Erblehen als nos Fideivels della Casa de Diu e comins vischins de Trun et als lur vignient suenter, resalvont e mes d' ina vart Giuncher Gaudenz de Lumbrins e quels che vidavon androgs enten la alp Nüdils, nossa mesa alp Russein et nossa alp Ponteglias, schischenta enten la faria de Trun, con tut quei che auda lautier, con tala condizion, che els a Nus sura nomnau avat Johannes u a nies vegnent suenter perquei en perpeten e scadin onn en particolar per in

* Pergameina originala tudestga e document original de translaziun egl archiv de Trun.

** Johannes Ussenport, avat de Mustér 1449—1466.

dreg tscheins deigen dar rispondèr e pagar enten nossa Claustra a Mustér treis centners caschiel e dua stera piaun senza negin nies donn a buna fei senza malart.

«Nus sura nomnau avat Johannes e nus il sura nomnau Convent della sura scretta Casa de Diu vein era considerau la fideivladat et ils maret dil nies fideivel *Marti Jacobs*, che el a nus et a nossa Casa de Diu a faig e per il avignir per nus e nies vegnient suenter bein po meritar, et vein agli resalvau, che per sia vetta dudisch vacas en Russein deigi poder metter ad alp et ton biestgia schetgia sco audi tier tontas vaccas a suenter sia fin deigen ses artavels cargar ad alp sco auters comins vischins de Trun senza nies, de nies vignient suenter ne dils sura numnai vischins de Trun et lur artavels impedimen u contradictiun a buna fei senza malart.* — Perquei els Nus era tuts nunseparadameing an dau, conderschiu et pagau quronta buns renschs, ils quals nus enten nies nez e della nossa Casa de Diu vein applicau e mess. E perquei sche duein e

* Marti Jacobs (Jacum), Landrichter della Ligia Grischia 1458/59 e 1460/61, emprim mariu da mumma Elsia de Trun, feglia de Jannick Dagasura, buca meins meritei-va pella claustra de Mustér, en favur della quala ella ha cumprau anavos la dieschma sin ina gronda part funds a Trun, ch' era stada alienada sin via d' infeudaziun. Mumma Elsia ha giu dus marius, il secund cun num Hans Schamunnen. (Urbari de Trun, partiziu: Mutter Elsy Dryssigist 1473.) Il num „Accla Martin“ per in complex de quolms a Trun astgas derivar da quest Martin Jacobs.

lein Nus sura nomnau avat Johannes et nus il entir Convent della sura Casa de Diu et nies vignient suenter ils sura screti vischins de Trun e lur vigniensuenter per las sura screttas alps els en tuts dretgs nua, cura e co els vesan baseings u vigniessen en baseings, ei seigi endertgira spirituala u secolara, mantener a buna fei senza malart. A per confirmazjun della verdat, sche vein nus sura numnau avat Johannes il nies Sigil per Nus e Nies vignientsuenter e Nus sura numnau Convent per nus et Nies vignient suenter aviartameing mes vid questa bref, la quala ei dada oig dis suenter Soing Hilari enten il on dumbrau suenter la naschientscha de Cristo melli quatter tschien e sisonta et in onn.»

«Che la presenta copia da plaid per plaid substanzialiter seigi tratgia ord il ver original tudestge translatada fideivlamein en Romonsch sin supplica e garigiar dils pursanavels de Russein de Trun entras mei Nicolaus Josef Berther, de quei temps mistral regent dil Comin de Disentis, hai jou, sin garegiar et Supplica dils sura screts Pur-senavels corobarau con il Sigil dil Cumin, il qual ei daventau a Trun ils 12 de Maig il onn 1772, a mi, 'gli Cumin et als mes senza don.»*

L. S.

* Nicolaus Josef Berther de Trun-Darvella, valent um perdert, 1753/55 potestat a Trahona, ha 1759 per commis-siun de vischins de Trun regulau igl archiv de vischnaunca.

La sura brev ei interessanta en contegn sco en fuorma originala e de translaziun.

Entras la creaziun dil feudum arteivel vegn scafiu ina relaziun perpetna denter il surdader (infeudader) e ses successurs d' ina ed ils suprendiders (infeudai) e Iur successurs da l' altra vart. Igl infeudader surdat la perpetna gudida vid il bein schiscent agl infeudau e quel surpren de pagar in perpeten tscheins annual, el vertent cass en naturalias. Igl infeudader empermetta ~~de~~ garantir agl infeudau il bein surda nua e cura che basegns seigi. Ei nescha per stabel ina relaziun de dependenza sin la vart digl infeudau ed ina relaziun de domini e protecziun sin la vart digl infeudader, la quala schendra in cert stan de vasalladi. Las alps ed ils auters beins, che la claustra ha alienau sin via ded infeudaziun, gudeva ella vidavon era buca tuttas sezza. Quellas vegnevan dad ella segiramein affitadas onn per onn a vischins della casa de Diu, probabel als medems, che han pli tard obtenu quellas sco feudums. Tala gleut ha perquei vidavon sesanflau en in stan de dependenza dalla abbazia e vegnan perquei numnai «ils fideivels della Casa de Diu» u ils «cumins vischins» («getreuve Gotthus lütt und gemeine Nachburen zu Truns»).

Sclaus dalla infeudaziun comparan «Giuncher Gaudenz de Lumbrins e quels che vidavon an dretgs enten l' alp Nüdils». — Co eran Gaudenz Lumbrins ed ils auters arrivai en possess dellas alps Nadils?

Quei resulta da negins documents e negina tradiziun raquinta, che las alps de Nadils seigien enzacuras stadas engreviadas cun tscheins-fier, che laschassen presumar lur derivonza sco feudum ord mauns d'in segneradi. Certamein vegness en quei cass negin auter en consideraziun, che l' abbazia de Mustér! Ei selai pia buca concluder auter, ch' ils personavels de Nadils possedevien vid quell'as alps veglia proprietat, independentamein dalla claustra, dalla quala ha resultau per els in auter stan sozial, che per ils vischins infeudai cun l' alp de Russein. Parentadas l' ina cun l' altra fuvan quellas duas categorias de vischins en la medema vischnaunca cheutras, ch' ellas appartenevan alla medema giurisdicziun della Casa de Diu (Cadi), denton fuvan ils de Nadils denter tals ils libers. Lur libertat ha basau sin lur proprietat independenta! Professor Muoth pretenda en sia monografia «Die Thalgemeinde Tavetsch», ch' en tala vischnaunca hagien sper ils vassals della claustra era existiu gleut libra e motivescha questa sia pretensiun cun l' analoga circumstanzia, che la vischnaunca de Tujetsch hagi possedu alps, sur las qualas seigi vegniu disponiu independentamein dalla claustra de Mustér. Nus adoptein ord ils motivs sura allegai era per Nadils questa idea, la quala ha dau caschun a Sgr. Dr. P. Tuor d' exprimer en sia tesa de doctorat sur «Jls libers de Laax» la supposiziun, ch' il regiment territorial della claustra de Mustér

hagi en siu dequors de svilupaziun tonaton buca pudiu semanifestar lunsch avunda per bandischar las restonzas d' anteriusas libras cuminonzas.*

Las relaziuns scaffidas denter infeudader ed infeudai han era tier l' alp Russein ne vuliu ne sa- viu impedir la svilupaziun dil feudum tier ina alp de corporaziun, anzi han ellas scaffiu la pusseivla- dat leutier. Quei che havess doviu posseder caracte- ter stabel fuva sulamein il tscheins perpeten (tscheins-fier) stabiliu — quei oravon da vista dil signur anora — e l' arteivladat dils dretgs de gudida sil vgnentsuenter dils infeudai en u- niun cull' obligaziun tiel pagament dil tscheins an- nual. L' emprema caussa dovess haver giu sia ga- ranzia alla brev de feudum sezza, la secunda per part era, per part ella organisaziun dils infeudai u lur successurs entras tschentaments e statuts e la manutenziun de quels. — Denton ha ne ina ne l' altra caussa pudiu resister el dequors dils tschen- taners.

La posteriura doctrina de dretg, che nunsligei- vlas grevezias perpetnas hagien buca dretg sin sub- sistenza, ha era peggiau ragisch en nossa tiara ed el dequors de cerca quatter tschentaners suenter la creaziun de nies feudum ei la garanzia per la sta- teivladat de quel sco dils auters vgnida sattrada entras ina lescha cantonala grischuna de 1806 sur il puder cumprar liber dieschmas e tscheins-fier,

* Dr. P. Tuor: Die Freien von Laax, pag. 129 e 130.

la quala ei vegnida confirmada e remplazzada entras §§ 274—278 dil dretg privat grischun. Sut domini de tala lescha han era ils personavels de Russein de Trun preferiu de sligiar lur grevezia perpetna de furnir caschiel alla claustra encunter ina summa aversala.

Buca biars onns avon che quei daventi, entuorn igl onn 1840, ei naschiu ina dispetta denter ils personavels de Russein de Trun e la claustra, concernet il quantum caschiel che seigi de furnir annualmein, la quala ei vegnida sligiada avont la dertgira cantonala grischuna cun sentenzia dils 13 de Mars 1850*. Ils personavels de Russein de Trun han sco ei para entschiet a dubitar, ch' els dettien cun 360 crenas pils 3 centners, conteni el document de 1461, memia bia caschiel. La dertgira cantonala ha denton obligau ils renitents de pagar pils 3 centners 360 crenas, pia 120 crenas per centner, essent constatau tras ils mussaments prestai, ch' ei seigi schi lunsch sco selaschi ira anavos adina vegniu dau 360 crenas per 3 centners. Ei fuss stau interessant, sche la sentenzia havess era sligiau la caussa mathematicamein e detg pertgei in centner de 1461 contegni 120 crenas de 1850. Evidentamein ha ei retractau tier ils personavels de Russein de Trun d' ina errur denter crena vedra e crena nova, aschia che tals han survesiu, ch' els 3 centners de 1461 fuvan conteni 300 crenas

* Acts processuals e sentenzia egl archiv claustral.

vedras, che han representau 360 crenas de 1850. Ei havess d' in temps tier la peisa pia dau ina crena veglia e pli tard ina crena nova, analog sco ei ha pli baul dau tier la mesira correnta e quadrata in bratsch veder e pli tard in bratsch niev, che ha formau la basis per il fest veder e fest niev e per la tschuncheisma vedra e la tschuncheisma nova tier la mesira cubica.

Dals acts de tal process resultescha ulteriuramein, che la claustra de Mustér retilla da quei temps enneu aunc annualmein tscheins-fier en naturalias (caschiel) ord mauns dellas suondontas alps: dalla vischnaunca de Tujetsch per las alps «Val e Val-Giuf» 5 centners (600 crenas); dals personavels de Russein-Mustér 3 centners (360 crenas); dalla visch-naunca de Sumvitg per las alps »Naustgel e Vallesa» 4 centners (480 crenas) e dalla vischnaunca de Breil, senza indicar per tgeininas alps, 348 crenas.

Nus rubrichein quei en quest liug, resultond ordlunder in diember alps dapli cun lur origin sco feudums ord mauns della abbazia de Mustér.

Nus havein gia dau d' entellir, ch' era la staeivladat dil bein infeudau en mauns dils successors dils infeudai personavels de Russein de Truhagi buca pudiu semantener perfetgamein, il qual nus vesein pli tard.

Oravont havein nus de considerar l' ulteriura svilupaziun della corporaziun cun laschar plidar ils documents.

Tschentaments de 1602.

«Enten Num de Nies Segner Jesu Christi Amen.»

«Enten ilg on Melli Sistschien a dus Essen *nus cau Suenter numnai vischins e personavels de Trun* Serimnai ensemens a vein perinameing priu si de salva ils subsequents artichels, per cau tras previgni a tut has e Scuidonza, Sco era Spergniar Lavur e Bregia a Sinaquei che ton ilg Pauper sco il Reh Sapi il siu gude e Senezia e che questa nossa alp de Russein possi vigni gudida Seneziada en amicabla concordanza.*

Per ilg emprem Sche havein nus fatg questa ordinaziun cun favur, Savida a Lubientscha dilig Nies Grazius Sigr. Jacob, avat de Disentis,** il qual ha era part a cuminanza enten la medema alp a havein era fatg cun savida a cuselg e veglia de Nos Sigrs. a Superiurs Mistral a Cuselg de Disentis a quels artechels enten il present Cudisch schau Scriver en entras ilg Serementau Landschr., ils quals per ilg avigni deigien vigni ferm a stateivlameing salvai a vivi suenter a per perdetgia de quei hai Jau Landschr. cun miu agien maun Suttascret.***

* La translaziun ha schau daven ils nums conteni en igl original tudestg.

** Jacob Bundi, avat de Mustér 1593—1614.

*** Scarvon de Cumin ei Jacob Burtigliun staus quei onn. Sco tal suttascriva el la purgameina de 1602. La translaziun ha schau daven sia suttascripziun.

Suenter quei che ils nos Perdavons han giu
 ritschiert la alp dilg Revdsm. Prenzi et Sgr. Avat
 Johanes ault Luidada memoria a Sia Grazia ilg Con-
 vent enten questa fuorma: Per ilg emprem ei vi-
 gniu resalvau a priu ora trenta quater dreitgs avon
 tut auter, il reminent aber han ils auters, ilgs quals
 cun ils numis cau Suenter suondan, Sco era ils Lur
 artavels che han giu Part a dreitgs de carga ton
 Sco ei pudevan enverna ora. Sche havein nus quels
 artechels priu si enten tala fuorma e vein sin min-
 tgia cau faitg e mess quater dreitgs, Sinaquei che
 Mintgin pli bein il siu sapi gude e Senezia, vender,
 metter sut a hypotheca ne sco ei a mintgin plaigi
 de fa, tonaton aber adina als Personavels avon au-
 ters. Sche ils Sezs aber buca lessen prender, Sche
 possien era ad auters far amognia ne vender, zvar
 adina cun reservada, che ils Personavels possien ver
 la traitgia avon auters. Sco era buca meins ei con-
 clidiu, che agli Casa da Diu per ilg Lur tscheins
 senza don ne pregiudezi, Sonder che a leza vegni
 dau e pagau Sco entochen en cau ei vigniu dau.

Nus Personavels havein era priu si a risalvau,
 che nigin dreitg deigi ni possi vigni Spartius, Son-
 der che quels deigien restar entirs e deigi adina
 quel, che ha la pli pintgia porziun lundervi, da a
 quel che ha il bia per la taxa sco cau suenter
 suonda e deigien era buca pude vegni vendi ord
 la vischnaunca de Trun, per Rischun che la alp
 schori della entschatta ei a nus Surdada cun quella

condizun. Sut peina de piarder ses Dreigs. Ei deigi era nagin vischin puder carga, il qual Seigi bucca vischin della vischnaunca de Trun. Ei gliei era concludiu, che in che vegli vender in dreitg ne plirs, sche deigi el per ilg emprem ver amognia a Sees pli tier parens de Saun [: gie sche els setegnien si et en vischins de Trun:]. E sche ils sezs bucca dessen prender, sche po in auter, ilg qual schon vidavon ha dreitgs en quella alp, prender. Sche ei fuss aber nagin de quels che lessen prender, sche deigien alura tuts da cuminanza cumpra e paga per in dreitg della alp Sedisch renschs buns daners a 15 baz de Cuera per Risculti, muneida de Muste. A Sinaquei che la alp vegni bucca vendida ord la nostra vischnaunca, sche havein nus quei concludiu e tschentau si.

Ei gliei era concludiu, che sche ei fuss in ne pliis che havessan dreitgs en la menzionada alp a tergies daven ord nossa vischnaunca, sche possi el buca carga, sunder sto quels surda sco sura ei faitg menziun e nus essen obligai de uarda per in comprader ne verameing cumpra en general, sinaquei che mintgin dilg siu sappi Senezia e sche ei fuss in ne pliis, ils quals bucca lessen sta da quella ordinaziun a vigni suenter, quels deigien a lur Cuost sesurvi de la via dilg dreitg a bucca ils personavels ne ilg vischinadi, pertgei che quels che en presentameing de sta e salva sco caū ordinatamein stat scret. Sche ei aber fuss intgin, ilg qual less

bucca sta da quei, sche lein nus personavels e garegiein de sta, sco pli de velg ei vigniu gudiu a possedu.

Nus duein in cun gliauter, sche in haves dreitgs de pli che sco el duvras, Sche dei el scha via ilg emprem als Personavels in dreitg per dudisch baz de Cuera. Scha ils personavels bucca drovan, Sche po el scha via enzanua auter sco el sa et po, tonaton adina cun cuselg dils Personavels. Jl Samiglion era cun ilg vender era bucca ord ilg vischiniadi de Tiun. Deigien nuottatonmeins ils Personavels adina haver la traitgia a deigi da quellas varts vigni fait ilg . . . Tenor ilg Bunds artichel e tschentamens della Tiara. De quei che fuss vendiu ne mess sut avon la entschatta de Marz, dei era avon che quei temps vigni spindrau. Quei aber che fuss daventau suenter, possi era en temps de 8 dis vigni spindrau.

Item possi mintgin, che ha dreitgs en quella alp de carga, era carga tons tgiaus s. h. biestga Schetgia sco el carga tgiaus vaccas et era bucca pli. Sche in aber haves buca biestga scheitgia, quel dei scha ad in auter vischin, il qual ha era dreitgs en quella alp. A in biestg Scheitg aschia dei vigni pagau per la jarva in baz a buca pli per tgiau e sche in haves biestga schetgia a les sez buca carga, Sche a quel veng ei pagau nuot per la jarva.

Cau suenter vegnien anotai ils Personavels, ils quals han dreitgs en quella alp e cons mintgin hagi

e suonda per ilg emprem ils dreitgs, ils quals pertegnien tier als Hoff(s), ils quals consistan en trenta quater, ils quals senumnen en nies Lungatg *Dreitgs Marias* et vegnien per ilg emprim anotai.*

Igl ei era vigniu concertau, che sche ei füss intgin che vendes ne cumpras alp, sche deigi el ira aunc ina gada avon ils personavels e fa tre ord ilg Rodel ilg vendider a encunter comi metter en il comprader aschi savens Sco ei Schabegia. Ilg Semiglion deigi ei era vigni Secontentiu cun quels che ins artas e, schi dig Sco quei ei bucca daventau, deigi nagin pude carga, Sch' el bucca füss Screts en, ei davanti alura per ignoranza ne che las sezas persunas füssien ugadadas, aber tuta malezia e malart dei cau esser Sclaus ora.»

Ordavon tut deplorei nus en vista de quest statuts organisatorics, che la translaziun contegn buca ils personavels participai vid la corporaziun. Ei havess aultamein interessau d' endriescher a tgei familias tuttas «della Casa de Diu» a Trun igl avat de Mustér haveva surdau questa sia mesa alp de Russein. Solettamein ils numbs dils ugaus dell' alp de quei onn ein a nus spindrai entras l' enconuschenta purgameina tudestga de 1602. Els secloman Landrichter Hans de Sax,** Michel Gurschilles, Christ Schan e Caspar Wiezeli. Igl ei per conse-

* La translaziun ha schau naven ils numbs conteni en igl original tudestg.

** Hans de Sax de Trun, Landrichter della Ligia Grischia 1600.

quenza buca d' eruir cun conta biestga l' alp vegneva primariamein cargada. Ordavon mavan ils 34 dretgs Marias e silsuenter curdavan sin scadina familia (cau) 4 dretgs. Sin scadin de quels dretgs astgava vegnir cargau ina vacca ed in biestg schetg. Oz ei l' alp Russein de Trun dividida en 121 dretgs, che portan scadin in armaul gron. Fuss l' alp la biala entschatta stada dividida en 121 dretgs, per metter sin scadin ina vacca ed in biestg schetg, havess quei dau in diember de 242 armauls, che l' alp pudeva sut neginas circumstanrias portar. Ei fuss plitost de presumar, che l' alp seigi lu stada dividida en 60 dretgs e ch' ei vegnevi cargau sin scadin de tals ina vacca ed in armaul schetg, nunder resultass in diember de 120 armauls en total. Dil rest correspundan ils actuals 121 dretgs buca cun la primara partizun, che preveda ordavon 34 dretgs Marias e silsuenter 4 dretgs per cau, nuditgond la ceffra sezza de gest 121 dretgs. Vesend nus pli tard, ch' ei ha dau personavels, che han encuretg de far valer, ch' els possedien pli bia dretgs, che quei ch' ad els udevan, selai bein presummar, ch' in ne l' auter dretg seigien el dequors dil temps tonaton naschi da sesez.

Curdond ordavon 34 dretgs dapersei sco dretgs Marias, sils quals curdavan de cargar 68 tgaus, resultassen pil temps de 1602 mo circa 7 ulteriurs personavels, il qual fuss strusch de capir. Co ils 34 dretgs Marias ein naschi selai medemamein

buca eruir. Ord il document de feudum de 1461 sclareschan quels en negina maniera. En tal vegn l' alp Russein surdada senza neginas semegliontas resalvas, priu ora la favur per Landrichter Marti Jacobs, entiramein als vischins della Casa de Diu a Trun. Ils dretgs Marias ein pia naschi pli tard, egl interval de 1461 entochen 1602.

Ils statuts de 1602 sco tals ein d' ina exemplara perfecziun. En special vala quei concernent las rigurusas precauziuns per garantir, ch' ils dretgs de Russein restien en vischnaunca de Trun e tonaton ei quei buca reussiu, sco nus vesein quei ord ils suondonts documents.

»Suenter de quei aschia ei successivameing vigniu encunter ils sura scrits uordens schlehigiau en Personavels jasters e Particolarmeing della visch-naunca de Sumvig en intrai pliis, tgi entras jertas e tgi era entras cumpra, ed aschia gudiu senza formala opositiun dils personavels de Trun entochen igl on 1705, de maniera che la alp plaun a plaun fuss vignida surprida da Personavels jasters, che havessen giu nagins funs sil itsches de Trun e per quella fin han quels de Trun encunter ils conpersonavels de Sumvig priu in dreig, dil qual sesafla ina copia ne extract digl Protocoll sut la data da igl sura on en Tudesck, corroborada cun il sigil della Ligia Grischa ed ei sco suonda:

Copia ne Extract digl Protocoll de 1705, ils 30

de Jan. en Musté. Fuva derschader Sgr. Land. regent de Caprez*

Jlg Sgr. Sthr. Lureng Lombriser sco ugau cumendau dilgs Personavels de Russein de Trun meina in Ploing entras ilg siu cun dreitg lubiu mussadur. Sgr. Landa Johann Franz Jagmet encunter ils Personavels de Sumvig, che han semiglionta mein dreitgs en quell' alp, a metta en substanza, che suenter quei che l' alp de Russein avon biars onns seigi stada partida e separada, sche seigi dentier. Els vigniu stabiliu a tschentau giu ina convenziun e zvar cun cuntertientscha dilg Sgr. Praelat de quei temps era, la quala ei vignida messa per scritt e tschentada si e particolarmeing per ton pli ferma autenticaziun a perdetgia de quei vignida entras ilg serementau Scrivon da gliez temps scretta enten in Cudisch, la quala consista, che de negin temps deigien ils dreitgs della alp de Russein, Seigi entras jertas ni schiglioc entras cumpras, pude ira ne traitgs ne pri orda Lur vischnaunca, sunder che quels da tut temps deigien esser et restar en Lur vischnaunca a che mintgin per ilg emprem ils pli tier Parens a Suenter ils Personavels cun depositar in cert quantum per taxa, sche ei vignies a da quella che tals lessen vigni traitgi ord la visch-

* *Hercli de Caprez* de Trun, potestat a Bormio 1691/93; Mistral della Cadi 1696/97, 1704/05, 1716/17; Landrichter della Ligia Grischa 1717/18, Syndicatur 1721; 20 onns gerau a Trun. Tut tenor registrazion sin ina tabla de familia en possess dil Hotel Tödi, anteriura casa de Caprez, a Trun.

naunca, possien trer a sesez ad enten cass che tras
in de quels lessen, sche deigi la visch naunca esser
obligada de cumra. Et ussa aber sesafli ei, che
da enzitgei temrs enneu quels de Sumvig hagien
biars de quels dreitgs traitg a sesez, part entras
jertas, part era per cumpras, de maniera che en
semiglionta constituziun vignessen els privai de lur
dreitgs e pudessen cul temps stuer tener ilgs Lur
s. h. tiers en nuelg. Et aschia, per previgni a quei,
sche seigien ei cau avon il Lud. Oberk. per da quel
rugar, che entras la sia autoritat vegli disponer et
obliga quels Personavels de Sumvig, che els enten
vertit dellas faitgias convignentschas scretas a re-
gistradas enten il menzionau Cudisch tals dreitgs
suenter meldigia, cun deposita la taxa a prezi, scha
ad els vigni tier e Setiuer, a che in lud. Oberk.
vegli encanuscher ilg cudisch valeivels ed en crafft
e lau speras quels de Sumvig obliga de purta giu
tuttas spesas de quelas varts faitgas e las chura-
das, cun Reserva sin la risposta a cun Pli.

Sgr. Landa. Adalbert Maissen, sco ugau a as-
sistent de quels de Sumvig, dat en risposta entras
il siu era cun dreitg lubiu mussadur Sgr. Landa.
Flurin de Castelberg e di, che els bucca pauc sto-
pien seschmerviglia, che els enqueren de molesta
e mana els enten quots a spesas, aschinavon sco
quels lur dreitgs, part entras giestas jertas seigien
ad els vigni tier, part era tras reclis marcaus pry
sura, ils quals schon per spazi de biars onns sen-

za molestia hagien gudiu a possedu a seschmer-
veglien sin il pli aul grad pertgei els quels per ussa
veglien retre a prender anavos a veglien els en in schi-
liung ruasseivel possess perturba. Quei aber che
pertenes tier la tratgia, havessen els doviu far en
quei temps e termin sco il Bundsart. disponi a bu-
cca tenta de quei fa per ussa. Pertgei che ussa seigi il
temps schon dadig spiraus et els tschentai enten in
ruasseivel e vegl posses e cregien e manegien de
pude sta a vegni manteni tier quel a che els, quei
che ei cun giusteia vigniu tier entras jertas ne tras-
schiglioc Redlis a sidreigs marcaus a cumpras,
che negin cun Dreitg quei ad Els possi prender ne
retrer. A quei, che sco avon ei vigniu dilg ploing
mess avon, che seigi scret a convigniu, deigi vigni
anulau ed esser de nagina valur a che deigi negi-
nas novitats vignidas permessas e schadas tier cun
supplica che in lud. Obk vegli ad els star tier et
assister, et encunter comi obliga lur contrapart tier
Purta giu tuts donns e cuosts cun pli etc.

A cun quei tschenta la Part digl Ploing de ve-
gni vid Provas a pardetgias a Scartiras.

Sin igl qual la Risposta ha opponiu, cartent a
manegiont, che neginas perdettgias ne brefs a scar-
tiras possien vigni tadladadas encunter lur jertas,
ne redlias cumpras per consequenza tschenta sin
quei era a dretg.

Sin il qual ei entras in beyurthel enconischiu,
che tont il cudisch Sco era las Scartiras e Per-
detgias doveien vigni producidas a tadladadas.

Sentenza.

Suenter Ploing a risposta, detg ed encunterdetg, Legidas las scartiras a Cudisch, sco era ver entelgiu e ver considerau tut quei che ei vigniu avon dretg manau, ei cun Pli a sentenzia enconischiu, che la Risposta a quels de Sumvig, che enten la menzionada alp de Russein possedan dreitgs, ei hagien quels artau ne cumprau entochen encau, sche deigien ei restar en Lur possess. Vigness ei aber a succeder, che silg avignien intgin vignies en la numnada alp arta dreitgs senza funds, deigi el es- ser obligaus quels de scha sura agli vischca., per igl emprem als pli tier Parens en Trun, secunda- riameing als personavels de leu e per la davosa agli vischca. a quei cun metter a paga la taxa, sco de gliez temps ei igl cuors. Sche aber negin de quels, sco sura ei fatg menziun, lessen, sche pos- sien ei alura vender ne gude suenter bein Plische. Enten cas aber, che intgin Praus ensemens cun dretgs artas enten la medema alp Russein, sche dei el quels pude gude, schegie che el stes buca sesents a Trun e quei senza molesta. Don dreitg ei taxau agli Ploign 4 Fleps et alla Risposta 2 Fleps; ils au- ters cuosts mintga part vid seseza.

Che la presenta copia seigi entut a pertut se- miglionta alg original, vegn entras metter sut ilg sigil della Ligia Grischa en megliera fuorma coro- borau. Daventau en Trun ils 9 de Juny 1783.*

L. S.

* La sentenzia della dertgira dil Cumin della Cadî

Ao. 1792 ils 15 de Februar.

Ei de novameng entras ils Personavels de Russein, quëls de Trun, agitau avon Dreitg cun particulars era de Sumvig, che vevan aquistau dreitgs leu en quella alp, las rischuns dils quals ei de ver pro e contra el Protocoll dilg sura scret gi et on etc. ed ei suonda la sentenzia, sco sesafla, inscret sutascrit dil Scrivon de gliez temps Gion Battista Capeder.

Sentenza.

Suenter esser tadlau Ploing a Risposta, deitg ed encunter deitg, Sco era ligiu si la bref de Sentenza de Ao 1705 ils 10 de Jan., eis ei cun dreitg e Sentenzia enconuschiu einhellik, che la bref de sentenza allegada seigi encconischida enten Craft e valur e per consequenza seigi la part della risposta enten vertit da quella obligada de Surdar Lur dreitgs alla Part dil Ploing per ilg preci tenor meldigar della Sentenzia. Quels dreitgs aber che la risposta pudes haver cun ils funs artai, deigien restar en siu esser tenor plidar della bref de Sentenzia. Don dretg fl. 13,30 per part, ils auters cuosts mintga part vid seseza.

Gio: Bapt. Capeder, Scrivon.

Ao. 1798 ilg 1 de Juli en Trun, vesend sura, che era naschiu ina dispetta e difficultat partenent

datescha pia dils 30 de Januar 1705 e la copia de quella, legalisada entras il scarvont della Ligia Grischa, dils 9 de Juni 1783.

ils dreitgs della alp Russein numnau, sche han ils personavels seresolviu ed ordenau sut peina de piar- der Lur dreitgs, che ei pretendan de ver, e far in Rodel a scriver en tont ils possessurs sco era ilg diember dilgs dreitgs ed ei Resultau sco suonda:

La claustra de Musté ha dreitgs	15
La Faria de Trun ha dreitgs	7
Landa. Gion Ant. Schmid	5
Artavels Cundrau Schmid	5
Sthr. Chrest Mathias v. Christen	8
La massa ne casa de Cajacob de Rabius ensemen	8
Pli Gion Gieri Cajacob, felg de Jacob Caja- cob cun ses fargliuns che derivan da stat.	
Vigeli Valler stai dil Christ dil Vigeli,	2
Stath. Gion Franzestg Cagienard cun sia sora	2
Pli il Stath. G. F. ha in agien, che deriva <i>davard la cumpra dils funds de Marias</i>	1
Stath. Thumaisch Camenisch ha in dreitg agien	1
Pli ils artavels Seckelm. Christ Camenisch han	2
Gion Spescha ha in, che ei staus de ils ar- tavels de Stath. Jacob Genelin	1
Stath. Bistgaun Carigiet	1
Artavels Stath. Jacob Albrecht	5
Stat. Gion Gius. Milar	2
Clau Albin	1
Carli Tgietgiel cun ses fargliuns	3
Ant. Caplazi siu agen pli cun ses fargliuns	1 2
Gieri Vinzens	1

Flurin Ant. de Curtins	3
Stath. Flurin Spescha	2
Christ Carigiet	6
Joseph Carigiet	3
Gion Geri Foppa de sia Duna	1
Stath. Chrest Mudest Caliesch	5
Gienard Milar	1
Jac. Anton Genelin	1
Gion Paul Cagienard	1
Christ Ant. Spescha	1
Stath. Jacob Ant. Deruns	2
Gliezi Tomaschett	1
Jacob Spescha	1
Gion Antoni Spescha	5
Artavels Jacob Cagenard	1
Stath. Mihel Spescha	6
Gieri Pedret	1
Gion Paul Spescha	5

Total dretgs sco ei sto esser 121

Ao. 1798, ils 20 de Juli, en Trun.

En quels treis dreitgs questionai, che carschevan, in de Gion Paul Spescha e 2 de Stath. Michel Spescha, vigni dils dreitgs pretendens desisti cun quella reserva, che sche ei avisien nuot auter ne fetschien ulteriuras questiuns avon ils cautegias, che quels sappien clomar ensemble ils Personavels exactamein cura che ei vegni tigliau pustretsch la emprema gada, Sche deigien ei de leu daven haver nagins Regress seigi silg Liung ne sigl Cuort pertenent

quels dreitgs a quei ei daventau en preschientscha dilg Sgr. Farer de quei temps Sgr. Camerer Laurenz Caplazi et siu Frar Gion Caplazi, sco era il scrivon Gion Ludovic Casanova et cautegias et per fede et commissiun Jau Gion Ant. Schmed, gerau da quei temps.«

Per impedir, ch' ulteriurs dreitgs de Russein de Trun vegnien alienai ord Trun*, ei la vischnaunca aunc el dequors dil davos tschentaner stada necessitada de sin fundament dils statuts de fondaziun della corporaziun cumprar 37 dreitgs de tala alp. La cumpradra ha lu silsuenter, igl 1 de Settember 1868, cediu tals a vischins de Trun sut las suondontas cautelas e condiziuns, correspondantas als tschentaments de 1602.**

»3. dueien ils cumpraders ner lur successurs buca schar ira quels nomnai dretgs ord la vischca. de Trun, seigi lura tras successiun, stumadira, maridar, vender ner baratar u schiglioc vuler guder quels ord vischca. ne en scadin auter cass che podes daventar per privar quels dreitgs della vischca., sunder che scadin possessur ner successur de quels dreitgs seigi obligaus, sch' el vul quels buca pli salvare e sa era buca vender en vischca., de render anavos alla vischca. per il sura preci de

* Compareglia la sentenzia de 1705 cheuavont en uniun cul suondont capitel.

** Protocoll della vischnaunca de Trun digl 1 de Set. 1868, contenent il contract de cumpra e vendita cun las su ttascripziuns dils contrahents.

fr. 120. —, sco quei che la vischnaunca empermetta medemamein de prender anavos quels pil sura prezi sco ella ha vendiu. Autras spesas, che vegnen forza fatgias per ameglierar l' alp, vegnan en negins cass risguardadas, sch' ils cumpraders tuornan anavos ils dretgs, sonder la vischca. paga mo il prezi de compra, dil rest han els vid sesez.

4. Empermetten ils cumpraders era de bucca schar vi de guder quels ord vischca. senza lubientscha della suprastonza.«

Ils dretgs Marias ed il hof de Marias.

Il hof de Marias sut Rabius stat en interes-santa connecziun cun l' alp Russein de Trun.* Gia en las emprimas convenziuns de 1602 denter ils personavels de Russein de Trun ein vegni menziona ed oravont tuts auters rubricai 34 dretgs, numnai *en nies lungatg ils dretgs Marias*, appartenents als *hofs*. — Sco il hof a Trun, aschia ha d'in temps era ina possessiun el hof Marias sut Rabius appartaniu alla claustra. — Quei ha nuota giu d' impedir pli bia, essent tal hof lu situaus sin territori de Trun e tenor statuts dell' alp Russein de Trun per quei legitimaus de posseder dretgs en quella. Tont pli curiosa para la relaziun territoriala de Marias

* Il hof *Maryas* sut *Rabius* ei buca de sbagliar cul hof Marias sper il vitg Sumvitg, che compara aunc cul hof Tschamott dadora Compadials, medemamein dus hofs della Claustra, ella brev de feudum per Naustgel e Valesa de 1460.

cun Trun. Gest questa circumstanza de curiositat de territori ha empodiu, che la vischnaunci de Sumvitg ei pli tard daventada possessura de 29 dretgs de Russein de Trun. Quei ei succediu aschia: Ei ha dau in temps pli vegl, el qual il hof Marias udiva territorialmein cun Sumvitg ed il vischinont hof *Tschuppina* cun Trun, tut caussa pli naturala, s'anflond quel sin la vart de Trun. Bucca cuntents cun questa relaziun, han quels dus hofs, senza dubi en entelgentscha dellas vischnauncas, fatg in comi, aschia che Marias ei vegnius cun Trun e Tschuppina cun Sumvitg. Quels de Marias — a Marias han existiu differentas casadas* — han bein gleiti seper-schuadiu de haver fatg ina sfortunada midada, mo eran curdai en ina relaziun nunmidabla, perquei che

* Tont resulta denter auter era d'ina sentenzia della dertgira de Mustér dils 14 de Matg 1538 sut Mistral Marti Martinut, concernent questiun pervia de dretgs vid l'aua de Rabius, ord la quala nus citein ils passus: „Da stand in das Recht Jacob Mastral Weibel zu Truns von seiner Vogts Sohn Zipert Tagk und Risch Tyron und Martin Tschan und Jan Maissen mit ihrem Fürsprecher Junker Gaudenz von Lumbrins von ihr Gadenstatt Maryas-sut, das das ehrwürdige Gottshaus zu Disentis zu Erblehen gelassen hat . . .“ e pli lunsch el medem document: „Da bin ich genannt Richter ob die Häuser von Maryas oben aber gesessen mit Kraft und Gewalt wie Recht und Urtheil vorgeben hat.“

Ord il dispositiv della sentenzia aunc: „Zum ersten denen von Cumadeyr und Bardagliun und Myra ist erkennt, dass sie mögen ein ehrbar Ziemlich Wasserleytte zu ihren Häusern und zu tränken führen, nachdem sie Brief und Siegel haben. Item zu Maryas mögen drei Wasserleytte haben, eins ob die Häusern von Alter her und das ander zu den Häusern auch wie von Alter her und das drytte zu Maryas sut das vom Gottshaus zu Erblehen genomen ist.“

Sumvitg ha buca retschiert anavos pli els. Quei tut resultescha d' in lungurus process purtaus ora en emprima instanza avont la dertgira de Mustér e silsuenter sin via d' appelaziun avont la dertgira dils «quindisch» della Ligia Grischa. La sentenzia de questa instanza finala secloma :

«Ich Jory da Garick diser Zit Landrichter des grauen pundt thun kundt meniglichen mit di sen briefe, dass ich zu Thruns an gewondlicher gerichtstatt öffentlich zu gericht gesessen bin in namen und von wegen der Hoptheren auch gemeinen pundts und sunderlich von des rechten wegen. Kam allda für mich und offen verban nen gericht die Ehrsamen *Nicolaus Wiezel, fren drich Gilli, bastgioun Thöny, alle in namen einer gantzen nohpurschaft Somfix* mit ihrem erlopten fürsprecher Hans von Capoll alten Landrichter und liessent hinklagen zu denen wollbeschei den *Loring Zing der iung und ander so zu Merias sesshaft* während auf mainung wie Merias in Thrunser Kilchöri zuhöre, auch mit ihnen wund und wayd haygend, auch alle Dorfrecht mit Steg und weg, mit stür und schnitz und andere Dorfrecht gemeindklich als andere nachpuren zu Thrunz mit heigent und syent des von althär also nachkommen on ihr und stoss und woll Meries uf ihr büt ligy. So hegent *ihr altvorderen* mit denen von *Tschuppina tuschet*, darumb brief und sigel ligy und müssen die von Tschuppina in ihr gpür haben

in allen ihren gerechtigkeiten, wunth und waiden, möchten auch woll liden der Tausch were nit beschehen. Nun heygent di von Mirias ein *guten tribnen weg* unnenus auf Thrunser allmendt und weyd zu fahren da sy gerechtigkeit haben und da one ihr und stoss fahren mögendt und da ihr fäch wayden und ätzen möge.*

Nun heyent sich die von Merias nit des benügen wollen und sy zu Disentis mit recht für gnomen. Da sy ihnen ein Urtel ergangen die sie beschwere, heyent sie für mich Landrichter und gantz gricht der Oberhandt zogen, gapaliert guoter hoffnung ihnen solle umb geben Urtel billichen wandel beschehen und wo sy heyend sagen wollen sie das wissen zeigen mit brieff und lüthen wie recht sy. — Do stunden härfür jung Loring Zing und ander sinen mithaften die zu Merias sesshaft sindt, mit ihr mit recht erlopten Fürsprecher Ulrich von Marmels Aman in Lungnitz antwurtendt sy befromth der Klag und sa-

* Questa via, numnada gassa de Marias, meina ora sin la pastira de Runcaglia, vendida avon entgins decenis dalla vischnaunca a privats ed ussa urbarisada, sbucca sper ils praus, che vegnan numnai „Strada“, el stradun veder, ord il qual ins arriva per la gassa de Mira a Cumadér e Bardigliun, nua che Trun ha da quei temps era giu pastiras, pli tard cedidas a privats.

Il trafic de vischinar, che ha regiu d'in temps dis de stad sin questa via, ch' exista oz mo en fastitgs, se lai imaginar cun considerar il cavrer ed auters pasturs cun lur montaneras en circulaziun daven da Marias e sper las casas dils succedents hofs de Cabusch, Mira, Cumadér e Bardigliun ora.

gen nit dawider dass sy nit zu Thruns an ihr pfar gehörent, doch so lig ihr hof uf deren vom Sumfix Zwing und büeth und heygent och vor etlich Jahren gemeinschafft mit ihnen kann und mainen es sy auch billig noh hütt zum Tag gemeindschaft mit ihnen zu haben. Nun heyendt sy das fründlicher meinung an sy begert, auch erboten als ander nohpuren sond und ton von ihr väch zu geben, auch wellend ihnen alle gemeine recht thun mit stägen und wegen, stühr und schnitzen, was ihnen der billigkeit noh ertragen möge. Das heygendt auch die Thrunser ihnen willigklich zu geben. Nun hei das beschehen mögen ohn gwalt des rechten. Herumb habendt sy ein ehksam nachpurschaft zu Sumfix under ihren orthenlichen stab mit recht fürgenomen die nun stos die glegenheit brief und lüth alles der nothurft noh besichtiget und verstanden, herauf ein urtel geben, by deren sy billich zu bliben verhoffendt.

Und noh Klag, antwurth, red und widerred ward der Zug uf den Stos begert, ouh das gricht daruf geführt und da etlich bar menty versigletten brief und den Urtelsbrief mit meng Kund-schaften darin verfasset, das alles noh beider parthien begär besichtiget, verhört, verlesen und genugsamlich verstanden.

Heruf fraget ich obgenante Grichterren ein jeden einer ume bei sinen aiden und meiner

Umbfrag noh gab recht und Urtel es solle wie von alter här blyben, dermassen heigent die Kläger ihr klag bezogen. Begerten auch die Sumfixer herumb brieff und siegl, des uf ihre Kostung ihnen zu geben und unsers pundts insiegel erkant wardt. Und zu urkund aller obgeschriebenen Dingen, so hab ich obgenanter Landrichter unsers pundsinsigel öffentlich heran gehenkt, doch mir, den richtern und gemeinen pundt ohnschädlich. Wardt geben und besähen am 24 ten Tag Mayens in Jahr gezahlt nach der menschwerdung Cristi 1548 Jahr.«

Havent aschia ils vischins de Marias avon em-prima instanza catau la fatschenta, silsuenter avon la davosa piars quella, ei quei hof definitivamein staus sclaus dalla cuminanza cun Sumvitg. Sche-bein quei ei stau la frida mortala per sia existenza vulein nus buca decider, casas e glieut ein dentont svanidas da quel che nagin sa cont daditg enneu.

En ina sentenzia della dertgira de Mustér de 1610 en ina questiu digl avat cun *proprietaris privats* de funds a Marias ed ella vischinonta «accla Balet», concernet l' obligaziun de tals funds de dar la dieschma alla claustra,* vegnan ils confins de Marias ed accla Balet precisai sco suonda: damaun *igl ual*, miezdi *il Rhein*, sera il bein *Durindonda*, mesa notg *la gassa*. Bucca sclarescha da tal docu-

* Publicaziun da Dr. C. Decurtins giud pagina 115 digl urbari della Claustra sco aggiunta 3 tier la lavur: Die Disentiser Kloster-Chronik des Abtes Jacob Bundi.

ment, sche il hof de Marias era 1610 aunc populaus ne buc.

Era la claustra sezza ei stada possessura d' in grond funds a Marias, che ha formau cul bein claustral sper il vitg de Trun ina economia. Resalvai tenor tschentaments de 1602, ordeifer ils personavels, che serepartevan sin l' alp, 34 dretgs, *numnai dretgs Marias*, astga ei strusch esser dubi, che tals fuvien dalla Claustra reaquistai per ses beins a Trun, ne che denter ils vischins de Trun, infeudai 1461 cun l' alp, s' anflavien era tals, che luvravien ils beins della Claustra a Marias e ch' il num »dretgs Marias» secombineschi cun tala circumstanzia. 1813 ha la Claustra venndiu siu bein a Marias a Mistral Gion Antoni Cagenard de Rabius, sco ella ha 1859 vendiu il hof a Trun a Gion Giachen Cavegn de Dardin a Madrid. *

Sco nus havein viu el dequors historic della corporaziun dell' alp Russein de Trun, ein differents privats de Rabius plaunsiu aunc arrivai en posses d' in diember de dretgs vid tala alp e quei muort munconza de manutenziun dellas statutas da part della corporaziun. Particolarmein a tals appartenavan suenter sura numnada vendita dil funds della claustra era tut ils funds de Marias. Alla energica iniziativa da quels ei finalmein reussiu quei ch' ils vischins de Marias han 1548 encuretg adumbaten: l' incorporaziun dils funds de Marias cul territori de

* Instruments de cumpra e vendita egl archiv claustral.

Sumvitg. Sco preparaziun tier tal pass ei stau la sligiaziun dil pastg cumin della vischnaunca de Trun vid tals beitis pella summa de 600 renschs igl onn 1822. Suenter differentas difficultats cun Sumvitg ei sut ils 15 de Schaner 1826 vegniu contraħau l'incorporaziun denter auter sut las suondontas condiziuns, che ston en questa connecziun vegnir rubricadas.

»3tio. Ils 29 Dreitgs d' alp, en l' alp Russein de Trun numnada, che en presentamein sin quei intschess de Marias, che ils particulars possessurs de quels funds han en general, tgi meins u pli, deigien buca mo ristar vinavon, sondern aschiditg sco ils particulars vultan quels salvar seigien ei obligai de vurdar, che vegni cargau ella numnada alp 29 s. h. vaccas annualmein della vischnaunca de Sumvitg, zvar bucca de quellas che han migliau fein jester.

4to. Seresolvan els aber baul ne tard de vender ils numnai dretgs, sche seigien ei de quei far patruns, bein aber oravon ver amogna alla lud. vischca., sche quella vul, stuer dar per 32 fl. l' in. Nunvulent aber retscheiver, seigien ei patruns ed auctorisai de vender nua che plai ad els.«

Per Trun resulta, ch' il consentiment della vischnaunca tier il comi denter Tschuppina e Marias hagi primariamein occasionau la *perdita* dil territori de Tschuppina e sia rolla passiva tier l'incorporaziun d' intschess de 1826 silsuenter quella dil territori de Marias cun 29 dretgs ell' alp Russein vitier.

Igl ei stau de preveder, che Sumvitg cumpri giu ils 29 dretgs resalvai, sco quella vischnaunca ha aunc tratg ils dretgs d' auters privats de Sumvitg a Russein tier sesezza. Perquei formescha la vischnaunca de Sumvitg, sco proprietaria de 46 dretgs, ensemencun ils auters personavels ord la vischnaunca de Trun la hodierna corporazion de *Russein de Trun.*

Trun, Uost 1918.

P. A. Vincenz, advocat.

